

诸子百家之杂家

疑
龙
经

中国古典精华文库

疑 龙 经

（唐）杨筠松 著

目录

上篇·····	01
中篇·····	07
下篇·····	12
附：疑龙十问·····	16
附：卫龙篇·····	26
附：变星篇·····	28

上篇

疑龙何处最难疑，寻得星峰却是枝。关峡从行并护托，矗矗枪旗左右随。

干上星峰金不作，星峰龙法近虚词。与君少释狐疑事，干上寻龙真可据。

干龙长远去无穷，行到中间阳气聚。面前山水又可爱，背后护龙皆反背。

君如就此问疑龙，此是干龙迎送队。譬如赍粮适千里，岂无顿宿分内外？

龙行长远去茫茫，定有参随部位长。凡有好山为干去，枝龙尽处有旗枪。

旗枪也是星峰作，圆净尖方高更卓。就中寻穴穴却无，干去未休枝早落。

枝龙身上亦可裁，半是虚花半是胎。若是虚花无朝应，若是结实护送回。

护缠尚要观叠数，一叠回来龙身顾。莫便将为真实看，此是护龙叶交互。

三重五重抱回来，此就枝龙腰上做。干龙尤自随水去，护送迢迢不回顾。

正龙身上不生峰，有峰皆是枝叶送。君如见此干龙身，的向干龙穷处觅。

君如寻得干龙穷，二水相交穴受风。风吹水劫却非穴，君如到此是疑龙。

请君看水交缠处，水外有山来聚会。翻身顾母顾祖宗，此是回龙转身处。

宛转回龙是挂钩，未作穴时先作朝。朝山皆是宗与祖，不与千里远迢迢。

穴前诸官皆拜揖，千源万派皆朝入。此是寻龙大法门，两水夹来皆转揖。

寻龙何处使人疑，寻得星峰却是枝。枝叶乱来无正穴，真龙到处又疑非。

只缘不识两边护，却爱飞峰到脚随。飞峰斜落是龙脚，脚上生峰一边卓。

真龙平处无星峰，两边生峰至难捉。背斜面直号飞峰，此是真龙夹从龙。

一节生峰一节插，两节虽长号宽峡。峡长绕出真龙前，背后星峰又可怜。

到此孤疑不能识，请向正龙寻两边。两边起峰为护从，正龙低平最贵重。

星峰两边转前揖，揖在穴前为我用。问君州县正身龙，大浪横江那有峰。

起峰皆是两边脚，去为小穴为村浇。如此寻龙看两边，两边生脚未尝偏。

正身绕却中央去，禄破文廉多作关。关门是为有大小，破禄二星外为拦。

禄存无禄作神坛，破军不破作近关。要寻大地寻关局，关局大小水口山。

大凡寻龙要寻干，莫道无星又无换。君如不识枝干龙，每

见干龙多诞谩。

不知干长缠亦长，外山外县山为伴。寻龙千里远迢递，其次五百三百里。

先就舆图看水源，两水夹来皆有气。水源自是有长短，长作军州短作县。

枝上节节是乡村，干上时时断复断。分枝劈脉散乱去，干中有枝枝复干。

凡有枝龙长百里，百里周围作一县。百里各有小干龙，两水峡来寻曲岸。

曲岩有水抱龙头，抱处好寻气无散。到此先看水口山，水口交牙内局宽。

便就宽容平处觅，左右周围无空闲。断然有穴在此处，更看朝水与朝山。

朝水与龙一般远，共祖同宗来作伴。客山千里来作朝，朝在面前为近案。

如有朝迎情性真，将相公侯立可断，寻得真龙不识穴，不识穴时总空说。

识龙识穴始为真，下着真龙官不绝。真龙隐拙穴难寻，惟有朝山识幸心。

朝若高时高处点，朝若低时低处针。朝山亦自有真假，若是真时特来也。

若是假时山不来，徒爱尖圆巧如画。若有真朝来入怀，不必尖圆如龙马。

惟要低昂起伏来，不爱尖倾直去者。直去名为坠朝山，虽见尖圆也是闲。

譬如贵人背面立，与我情意不相关。亦有横列为朝者，若是横朝似衙喏。

前山横过脚分枝，枝上作朝首先下。首下作峰或尖圆，只只来朝列我前。

大作排牙小作列，如鱼骈头蚕比肩。朝余却去作水口，与我后缠两相凑。

交牙护断水不流，不放一山一水走。到此寻穴定明堂，明堂横直细推别。

横城宽抱有垣星，更以三垣论交结。交结多时垣气深，交结少时垣局泄。

长垣便是横朝班，局心便是明堂山。钩铃垂脚向垣口，北面重重尊圣颜。

大抵山形虽在地，地有精光属星次。体魄在地光在天，识得星光真精艺。

明堂惜水如惜血，穴里避风如避贼。莫令穴缺被风吹，莫使溜牙遭水劫。

问君如何辨明堂，外山抱里内平洋。也有护关亦如此，君若到此细推详。

时师每到关峡里，山水周围秀且现。踌躇四顾说明堂，妄指横山作真地。

不知关峡自周围，只是护关堂泄气。泄气之法妙何观，左右虽回外无拦。

此是正龙护关峡，莫将堂局此中看。与君细论明堂样，明堂须要之玄放。

明堂绕曲如绕绳，绕在穴前须内向。内向之水抱身横，对面抱来弓带象。

上山下来下山上，中有吉穴随形向。形若真时穴始真，形若不真是虚诳。

虚诳之山看两边，两边虚穴亦如然。外缠不转内托返，此

是贵龙形气散。

龙虎背后有衣裾，此是官阑拜舞袖。虽然有袖穴不见，官不离乡任何受。

贵龙行处有毡褥，毡褥之龙富贵局。问君毡褥如何分，龙下有坪如鳖裙。

譬如贵人有拜席，又如僧道坛具伸。真龙到穴有ブ褥，便是枝龙山富足。

此是神仙识贵龙，莫道肥龙多息肉。瘦龙虽是孤寒山，也有瘦龙出高官。

肥龙须作贵龙体，也有肥龙反凌替。问君肥瘦如何分，莫把雌雄妄轻议。

大戴亦尝有此言，溪谷为牝低伏蹲。冈陵为牡必雄峙，不知肥瘦有殊分。

汉儒以山论夫妇，夫山高峻妇低去。此是儒家论尊卑，便是龙家雌雄语。

大抵肥龙要瘦护，瘦龙也要肥龙御。瘦龙若有ブ褥形，千里封侯居此地。

敢将禹迹来问君，舆图之上要细论。寻龙论脉尤论势，地势如何却属坤。

若以山川分两界，黄河川江两源派。其中有枝济与河，淮汉汀水亦长源。

干中有枝枝有干，长者入海短入垣。若以干龙会大尽，太行碣石至海 需。

又有高山入韦岭，又分汝颖河流吞。南干分枝入海内，河北河东皆不背。

葱岭连绵入桂连，又入衡阳到江边。其间屈曲分臂去，不知多少枝叶繁。

又分一派入东海，又登碣石会为垣。一枝分送入海门，干龙尽在江阴坟。

若以干龙为至贵，东南沿海天中尊。如何垣星不在彼，多在枝龙身上分。

到彼枝干又难辨，枝上多为州与县。京都多是在中原，海岸山穷风荡散。

君如要识枝干龙，更看疑龙中下卷。

中篇

虽然已识枝中干，长作京都短作县。枝中有干干有枝，心里能明口能辨。

只恐寻龙到此穷，两水夹来风荡散。也有方州并大邑，直到水穷山绝岩。

也有城隍一都会，深在山原隈僻畔。今日君寻到水穷，砂砾坦然缠护窠。

右寻无穴左无形，无穴无形却寻转。寻转分枝上觅穴，惟见纵横枝叶乱。

也识转换也识缠，也识护托也识断。只是狐疑难捉穴，穴若假时无正案。

到此之时心生疑，若遇高明能剖判。为君决破之疑心，枝干乱时分背面。

假如两水夹龙来，便看外缠那边回。缠山缠水回抱处，背底缠山缠水隈。

护缠亦自月大小，大小随龙长短来。龙长缠护亦长远，龙短缠护亦近挨。

大抵缠山必回转，莫把明堂向外裁。曲转之形必是面，只恐朝山寨不开。

寻得缠护分明了，更看落头寻要妙。缠山缠水如屏，向前宽阔看多少。

缠水缠山作案山，只恐明堂狭不宽。山回水抱虽似面，浪打风吹岩壁寒。

请君来此看背面，水割石岩龙背转。若是面时宽且平，若是背时多陡岩。

面时平坦中立穴，局内必定朝水缓。紫紆环抱入怀来，不似背变风荡散。

君如识得背面时，枝干寻龙无可疑。宽平大曲处寻穴，此为大地断无疑。

详看朝迎在何处，中有横过水城聚。背后缠水与山回，相合前朝水相随。

后缠抱来结水口，前头生脚来相凑。两山两水作一关，更看罗星识先后。

罗星亦自有首尾，首逆上头尾拖水。如此寻穴与寻龙，不落空亡与失踪。

秤定上下左右手，的有真龙在此中。忽然数山皆逼水，水夹数山来相从。

君如看到护送山，上坡下坡事一同。无疑上坡是真穴，看来下坡亦藏风。

二疑更看上下转，山水转抱是真龙。夹龙身上亦作穴，此处恐是双雌雄。

虽作两穴分贵贱，分高分下更分中。也有真形无朝水，只看朝山为近侍。

朝水案外暗循环，此穴自非中下地。只爱案山逼水转，不爱顺流随水势。

顺流随水案无力，此处名为破城里。若是逆水作案山，关得外垣无走气。

也有真形无朝山，只要诸水聚其间。汪汪万顷明堂外，内

局周回如抱环。

钩铃键闭不漏泄，内气无容外气残。外阳朝海拱辰入，内气端然龙虎安。

枝干之龙识背面，位极人臣世袭官。总饶已能分背面，面得宽平背崖岩。

假如两水夹龙来，屈曲翻身势大转。一回顿伏一翻身，一回转换一回断。

两边皆有山水朝，两边皆有水抱岩。两边皆有穴形真，两边皆有山水案。

两边朝迎皆可观，两边明堂皆入选。两边缠护一般来，两手下边皆回转。

此山背面未易分，心下孤疑又难判。不应两边皆立穴，大小岂容无贵贱。

只缘花穴使人疑，更看护身脚各辨。莫来此处谈真龙，两水夹来龙必转。

逆转之龙有鬼山，鬼山拖脚皆后环。识得背面更识鬼，识鬼之外更识官。

大凡干龙行尽处，外山隔水来相顾。干龙若有鬼山，回转向前宽处安。

凡山大曲水大转，必有王侯居此间。也有干龙夹两水，更不回头直为地。

只是两护必不同，定有护关交结秘。干龙行尽若无鬼，须看众水聚何处。

众水聚处是明堂，左右交牙锁真气。如此明堂虽是真，锁结交牙诚可贵。

问君疑龙何处难，两水之中必有山；两山之中必有水，山水相夹是机源。

假如十条山同聚，必有十水归一处。其间一水是出门，九山同来作门户。

东行看西西山好，西上看东东山妙。南山望见北上山，山奇不秀疑似间。

北上看见南山水，矗矗尖奇秀且丽。君如遇见此处时，两水夹来何处是？

与君更为何分别，先分贵贱星罗列。更须参究龙短长，又看顿伏星善良。

尊星不肯为朝见，从龙虽来挠掉藏。贵龙重重出入帐，贱龙无帐空雄强。

十山九水难同聚，贵龙居中必异常。问君如何分贵贱，真龙不肯为朝见。

凡有星峰去作朝，此龙骨里福潜消。譬如吏掣与臣仆，终朝跪起庭前伏。

那有精神立自身，时师只说同关局。朝山护送岂无穴，轻重多与贵龙别。

龙无贵贱只论长，缠龙远出前更强。若徒论长不论贵，缠龙有穴反为良。

只恐录龙易厌尔，虽有眼力无脚力。若不穷源论祖宗，也寻顿伏识真踪。

古人寻龙寻顿伏，盖缘顿伏生尖曲。曲转之余必生枝，枝上必为小关局。

譬如人行适千里，岂无解鞍并顿宿？顿宿之所虽未住，亦有从行并部曲。

顿伏移换并退卸，却看山面何方下。移换却须寻回山，山回却有迎送还。

迎送相从识龙面，龙身背上是缠山。缠山转来龙抱体，此

中寻穴又何难。

古人建都与建邑，先寻顿伏识龙关。升虚望楚与陟，此是寻顿与山面。

降观于桑与降原，此是寻伏下平田。度其夕阳揆以日，南北东西向无失。

乃陟南冈景于京，此是望穴识龙形。陟彼百泉观水去，陟彼溇原观水聚。

或陟南冈与太原，是寻顿伏非苟然。古人卜宅贵详审，经旨分明与后传。

下篇

龙已识真无可疑，尚有疑穴费心思。大抵真龙临落穴，先为虚穴贴身随。

穴有乳头有钳口，更有平坡无左右。亦有高峰下带垂，更有昂头居陇首。

也曾见穴在平洋，四畔周围无高冈。也曾见穴临水际，俗人见穴无包藏。

也曾见穴如仄掌，却与仰掌无两样。也曾出穴直如枪，两水射胁自难当。

更有两山合一气，两水三山同一场。君如识穴不识怪，只爱左右抱者强。

此与俗人无以异，多是葬在虚花里。虚花左右似有情，仔细辨来非正形。

虚穴假穴更是巧，仔细看来无甚好。怪形异穴人厌看，如何子孙世袭官。

只缘怪形君未识，识得裁穴却无难。识龙自合当识穴，已在《变星篇》内说。

恐君疑穴难取裁，好向后龙身上别。龙上生峰是根婆，前头结穴是花开。

根婆若真穴不假，盖从种类生出来。若不随星识根种，妄随虚穴凿山隈。

请君孰认《变星篇》，为钳为乳为分别。高低平地穴随身，岂肯妄下钳乳穴？

穴若不随龙上星，断然是假不是真。请君更好旧坟覆，贪星是乳巨钐局。

外县京国多平洋，也有城邑在高岗。淮甸州县在水尾，夔峡山岭是城隍。

随他地势看高下，不可执一拘挛也。千万随山寻穴形，此说断能辩真假。

冀州壶口落低下，盖缘辅弼为垣马。太原落处尖似枪，盖缘廉破龙最长。

建康落在坡平地，盖缘辅弼星为体。太原平坦古战场，熊耳为龙星可详。

长安帝垣星外峙，巨武竹龙生出势。京师落在垣局中，狼星夹出巨门龙。

太行走入河中府，入首连生六七存。入首虽然只是山，落处却在回环间。

此与窝钳无以异，只在大小识形难。我观星辰在龙上，预定前头穴形象。

为钳为乳或为坡，或险或夷或如掌。历观龙穴无不然，大小随形无两样。

此是流星定穴法，不肯向人漫空诳。更有二十八舍间，星穴裁之最为上。

大凡识星方识龙，龙神落穴有真踪。真踪入穴有形势，形势真时寻穴易。

若不识形穴难寻，左右高低如何针？且如龙形有几样，近水近山随物象。

如蛇如虎各有穴，形若真时穴可想。龙有耳角与腹肠，鼻

颡如何却福昌。

虎有鼻唇并眼耳，肩背如何却出贵？看他形象宛在中，最是朝山识正龙。

高低只取朝山定，莫言三穴有仙踪。千里来龙只一穴，正者为优旁者劣。

枝上有穴虽有形，不若干龙为至精。龙从左来穴居右，只为回来方入首。

龙从右来穴居左，只为藏形如转磨。高山万仞或低藏，看他左右及外阳。

左右低时在低处，左右高时在高冈。朝山最是龙正穴，不必求他金尺量。

正穴当朝必有将，有将便宜为对向。穴在南时北上寻，穴在北时南上望。

朝迎矗矗两边檐，向内有如鸡见蛇。对面正来不倾仄，才方移步便欹斜。

只将对将寻真穴，将若真时穴最佳。乳头之穴怕风缺，风若入来人绝灭；

必须低下避风吹，莫道低时鳌裙绝。钳穴如钗壁隈，惟嫌顶上有水来；

钗头不圆多破碎，水倾穴内必生灾。仰掌要在掌心里，左右挨排恐非是。

窝形须要曲如窠，左右不容少偏陂；偏陂不可名窠穴，倒仄倾摧祸奈何！

尖枪之穴要外裹，外裹不牢反生祸；外山抱裹穴如枪，左右抱来尖不妨。

山来雄勇势难竭，便是尖形也作穴。只要前山曲抱转，针着正形官不绝。

穴法至多难具陈，识得龙真穴始真。真形定是有真案，三百余形穴穴新。

太凡寻穴非一样，降势随形合星象。譬如铜人针灸穴，穴的宛然方始当。

忽然针灸失真机，一指隔差连命丧。大凡立穴在人心，心眼分明巧处寻。

重重包裹莲花瓣，正穴却在莲花心。真龙定是有真穴，只为形多难具说。

朝迎护从亦有穴，形穴虽成有优劣。朝迎若是有真情，此是真龙断不疑。

朝迎逆转官星上，小作星形分别枝。虽然有穴非大器，随形斟酌事随宜。

大凡有形必有案，大形大穴如何断？譬如至尊坐明堂，列班排牙不撩乱。

出人短小与气宽，皆是明堂与案山。明堂宽阔气宽大，案山逼迫人凶顽。

案来降我人慈善，我去伏案贵人贱。龙形若有云雷案，人善享年亦长远。

虎蛇若遇蛤与狸，虽出武权势易衰。略举些言以为例，请君由此细寻推。

周家农务起后稷，享国享年延八百。秦人关内恃威权，蚕灭诸侯二世绝。

此言虽大可喻小，嵩岳降神出申伯。大抵人是山川英，天降圣贤为时生。

祖宗必定有山宅，占得山川万古灵（阙）。

附：疑龙十问

△一问抱养及僧道嗣续疑龙如何？

问君葬者乘生气，骨骸受福荫遗体。此说尚有一可疑，抱养之儿非己子。

僧道嗣续是外来，如何却也能承继？与君详论古人言，举此大略非徒然。

骨骸受气荫遗体，此理昭我不容议。却将僧道并抱养，辩论如何同己子。

此说诚然是可疑，固宜穷理细寻推。人家生出英豪子，便是山川鍾秀气。

山川灵气降为神，神随主者家生人。此山此穴认为主，即随香火降人身。

古人尝有招魂葬，招魂天人可为样。招魂葬了祀事严，四百年间汉家旺。

何拘骸骨葬亲生，只要祀事香火明。亦有四五百年祖，棺槨骸骨化为土。

子孙千百尚荣华，人指此山谁是主。此山此穴有主者，神灵只向此家住。

山川秀丽来为嗣，岂虑其家无富贵？山川日夜有朝迎，生

出为人亦如是。

乃知抱养与亲生，同受生灵无以异。故人接花接果义，与此相参非与是。

后母却荫前母儿，前母亦荫后母子。只缘受恩与受养，如同所生并同气。

以此言之在继承，只与香火无衰替。乃知招魂与抱子，僧道相承皆类此。

△二问公位疑龙如何？

问公如何分公位，父母生时无少异。间或生时有爱憎，死后何由别荣悴？

譬如一木同根生，一枝枯悴一枝荣。荣者芳 日夜长，悴者日就枯槁形。

此后遂有公位议，分长分中分少位。爱憎之说起于心，荣枯之说归于地。

心有爱憎死却无，地有肥磽此近似。东根肥即东枝荣，西枝磽云西枝悴。

要知此说未为当，似是如非当究理。左长前中右少位，此说当初自谁起。

请君来此细排详，因别长男中少位。震为长子居左方，坎为中男坐来冈；

艮为少男坐东北，乾统三男居坎傍；坤为地母西南位，长女东南中坤地；

兑为少女在西方，此是乾坤男女位。若以此法论阴阳，男

居左傍女西厢。

中子后龙中女向，自有次第堪推详。爰自萧梁争公位，却以玉鹅埋震地。

震为长子起春宫，遂起争端谋玉器。公位之说起于斯，断以长震中居离。

少居兑位四同长，五与二位分毫厘。六与少男无差别，七与长男同共说。

八与五位共消详，九与三男排优劣。此是河图分九宫，上远一四七相同。

中元二五八同位，下位三六九连此。后来执此为定义，只就河图分次第。

△三问公位盛衰疑龙如何？

问君公位虽能别，或盛或衰是何说？也有先盛后来衰，也有衰尽复萌孽。

此理如何合辨明，时师廖以水宫折。不知年久世成深，岂有长盛无休歇？

山川之秀虽盘固，气盛气衰有时节。代代长盛者无他，后来接续得吉多。

衰者后来无救助，年深气歇渐消磨。凡言公位勿固执，先看其人数代祖。

新旧数坟皆是真，新者必为旧者助。如是之家世民昌，福禄未艾不可量。

是真不必问大小，积小成大最为妙。是者一坟非者多，纵

有大地力分了。

譬如杯水救薪火，水少火多难救祸。是多非少反成吉，譬如众水成江河。

岂无一穴分公位，不取众坟参合议。大地难得小易求，积累不已成山丘。

众坟合力却成大，人说小地生公侯。那堪大地有数穴，世世公侯不休歇。

凡观巨室著姓家，必有大地福无涯。子孙百世虽分散，内有救地多荣华。

一穴大地荫十世，小地千坟亦如是。骐驎千里迸一日，弩马十驾亦追至。

图大不得且思次，此事当为知者议。

△四问阳宅阳宅疑龙如何？

问君阳宅要安居，此与安坟事一如。人家无坟有善宅，宅与阴地力无殊。

大凡阳宅性穴小，穴小只宜安坟妙。小穴若为轮奂居，气脉伤残俱凿了。

况是子孙必众多，渐次分别少比和。一穴裂而为四五，正偏前后岂无讹？

大凡阳宅要穴大，宽阔连绵又平伏。前头横玉面前宽，可为市井于内外。

如此方为阳宅居，窄小难容君莫爱。

△五问阳宅阳地大小如何？

问君阴阳有两宅，古人此事要分别。吕才详论有成书，论已分明无别说。

要知居止只要势，水抱山朝必有气。忽然陡泻朝对倾，破碎斜倾非吉地。

下手回环朝揖正，坐主端严无返柄。纵饶小大也安和，住得百年家业盛。

葬穴宜小居穴大，葬穴侧立居穴宽。

△六问主客山疑龙如何？

问君主客皆端正，两岩尖圆两相映。主是三山品字安，客亦三山形一般。

客山上见主山好，主山上见客山端。此处如何辨宾主，只将水抱便为真。

水城反背处为客，多少时师误杀人。凡观疑穴看堂局，堂局真处抱身曲。

忽然平过却如何，即以从缠分部属。缠送护托辨假真，朝山无从托龙身。

朝山直来身少曲，真龙屈曲不朝人。

△七问形真假疑龙如何？

问君龙固有枝干，识得枝中干分乱。故为干上忽生枝，枝上连生数穴随。

此是枝龙间旺气，譬如瓜蔓始生枝。分枝枝上连生子，生子之形必相似。

或如人形必数穴，禽兽之形必同列。凡为形穴必两三，盖缘气类总如一。

是故流形去结实，连生种类配偶匹。蛇形必定有雌雄，虎形相配无单只。

大山峡里莫寻蛇，恐是高山脚溜斜。若是真蛇有鼠蛤，如无鼠蛤是虚花。

或是蜈蚣出面来，亦有蚰蜒为案砂。大山猛兽莫言虎，恐是朝迎为主住。

重峰拜舞似虎行，若是真虎无阙屏。更有肉堆狮子案，如无此案是朝迎。

凡辨真假易分判，若是假穴无真案。若是真形案必真，人形人物两相亲。

兽形降伏如贪噬，禽形必有条为系。龙形云雷象近水，月形星案前陈起。

凡是真形有真案，试以类求当识算。

△八问干作枝衰疑龙如何？

问君前经论贵贱，上是侯藩次州县。干龙多是生王侯，枝作干龙亦蕃衍。

此说分明尚有疑，试举一说为君辨。前言盛衰固有为，枝上又生数条枝。

节节为龙自有穴，已作未作气自随。胡为上作下必歇，亦有下作上必衰。

既饶气脉相连接，自有气脉非相依。如何盛衰尚关属，为君决此一狐疑。

盖小枝龙气脉短，又出小枝无转换。随龙附气气不长，大势上连枝上干。

干头未作枝先兴，枝上未作干先荣。枝上未作干后作，干长枝短力难争。

恰似一瓶生数嘴，嘴小口大生水利。不从口出嘴长流，口若尽倾嘴无水。

又如大树生小枝，小枝易瘦大枝肥。大枝分夺全气去，小枝不伐自衰羸。

更看新作与旧作，年年深浅自可知。

△九问穴有花假疑龙如何？

问君前论穴难寻，唯有朝山识幸心。高低既以朝为定，真穴自可高低计。

只缘前后有花假，假穴在后亦堪下。花穴多生连案前，朝山对峙亦如然。

若将前相为证验，前后花假便不偏。到此令人心目乱，更有一说与人宣。

假穴断然生在后，龙虎虽端涯必溜。穴中看见龙虎回，外面点检山丑走。

花穴如何生在前，盖缘连臂使其然。连臂为案横生穴，案外有脚铺茵毡。

其间岂无似穴者？但见外朝尖与圆。疾师误认此花穴，不知真穴秘中垣。

前花后假人少识，此法元来秘仙籍。景纯虽然不著书，今日明言不容惜。

花穴最是使人迷，后龙断妙朝又奇。如何使人不牢爱，只有一破余皆非。

案山必然向里是，花穴无容有回势。朝山只有顶尖圆，定有脚手丑形随。

若登正穴试一看，呼吸四围无不至。又有花穴无人知，龙虎外抱左右飞。

盖缘正穴多隐秘，或作钗钳或乳垂。龙虎数重多外抱，龙上看虎左右归。

虎上见龙左右抱，或从龙虎上针之。不知止穴尚在内，凡是穴郭曲即非。

曲是抱里非正穴，请君以此决狐疑。

△十问博换疑龙如何？

问君寻龙莫失踪，三吉自有三吉峰。前去定作贪狼体，时时回顾火星宗。

及至剥入辅弼去，犹作小峰顾祖宗。如何变星剥换了，却与前说事不同。

盖缘干龙行千里，一剥一换一峰起。由贪入巨入禄文，次第入廉武里。

破军尽变入辅弼，每星十二大盘屈。蛇行鹅顶鹤爪分，失落低平骏马奔。

如此行来又数程，博换变易又前行。前行直到藩垣里，四外有山关水至。

低平尚有辅弼形，此是入垣寻至止。干龙行不问祖宗，枝上顾祖却不同。

干上剥换节节去，枝上落穴必顾宗。干龙一变少亦九，多者或至十二重。

一星十二节始变，周而复始换头面。贪尖巨方小卧蚕，如此周围换尽贪。

换贪若尽即入巨，亦如贪狼数节去。多至十二少九变，却变禄星分台去。

禄存节数如贪巨，换了文廉又至武。博换若周即转星，辅

星三四弼起程。

弼星入手必平漫，辅星入首多曲形。此是变星变尽处，变尽垣城四外迎。

凡观一星便观变，识得变星知近远。远从贪起至破军，换尽龙楼生宝殿。

虽然高耸却不同，还是尖峰高山面。一博一换形不同，岂可尽言顾祖宗？

君如识得变星法，千里百里寻来龙。谁人识得大龙脊，山正好时无脚力。

裹费不惜力不穷，其家世代腰金紫。凡看变星先看断，断处多时星必变。

如此断绝曲屈行，高入青冥变鹤形。鹤形渐低必断绝，断绝复起是变星。

却从变星辨贪巨，或是廉文武禄存。只以变星逆求程，识得变星节数法。

不必论程穷脚力，只从变尽至弼星。岂愁不识得垣城？

附：卫龙篇

辅弼入垣星既晓，缠送护托皆明了。如何尚有傍明星，此星能明最精妙。

左侍右卫形如何，此龙生处苦无多。除却天池并夹辅，高山顶生有平波。

天地之水满则溢，侍卫之水随龙入。深入坎井不闻声，恰似尾闾没无疏。

道是天地又却非，二山环合使人疑。不知龙自不央过，两边侍卫贴身随。

要在前侍并后卫，只有一丛贴身体。正龙高枝侍卫低，前池未满后池继。

看来彷彿似天地，只有流泉活处低。或由田源水入次，或有干窠如环随。

两池相逐前后卫，两池相夹左右同。此是贵龙亲侍卫，高处是首低是尾。

只观水流与不流，水若深潜是卫气。龙身若有此真形，一百里外垣城生。

分垣远去似不顾，垣穷尽处面前横。垣中横水从中过，远缠如带五里生。

垣前外列如打围，垣气足时无缺破。垣前水直入垣来，曲转东西垣亦开。

却有随龙小溪涧，弯环抱体常低徊。横城水绕太微势，直朝射入紫垣气。

百源来聚天市垣，一水抱曲是天园。更有天苑内无润，却有大水环三边。

平洋宛然是紫气，河中河曲是天市。关中只是天苑垣，伊洛亦合是天肆。

京师华盖是前星，东京三水入中庭。燕山最高象天市，天市碣石转抱紫。

太行之东有天市，马耳峰上有侍卫。长江环外有三结，三结垣前水中列。

中垣已是帝王州，只是垣城气多泄。海门环合似天市，天目天池生侍卫。

万里飞腾垣外色，海外诸峰补垣气。盛衰长短固有时，亦是山川积气围。

略举诸垣与君说，更有难言谁得知？上相次相既列上，上将次将必也两。

上卫次卫必居中，所论卫龙合天象。山川之气上为星，星辰列次应出形。

仰观星象储察理，卫龙内坚随龙行。只是贴身不关峡，以此可见天地情。

略言侍卫贴龙体，详别流星入无底。卫山环合夹龙身，此是垣关常紧闭。

屠龙不如且抵，多龙少却成痴。大言无当下士笑，或笑或取吾何辞。

附：变星篇

疑龙尽说总无疑，直龙藏幸便宜知。识得真龙结作处，岂逃真假干兼枝。

贪狼一变巨门星，星方磊落如屏形。顿笏顿钟如顿鼓，辅弼随行变禄存。

禄存带禄为异穴，异穴生成鹤爪形，鹤爪之形两边短，一距天然撑正身。

此是禄存带禄处，长短之穴为正形。起顶或成衣冠吏，短短低生左右臂。

左臂短如插笏形，右臂短如佩鱼势。时师至此多狐疑，却嫌龙虎不缠卫。

也有龙虎两头尖，左纽右纽休要嫌。也有龙虎生石嘴，时师到此何曾喜。

也有穴在大石间，也有穴在深潭里。也有左长右枝短，也有左短右枝长。

也有主山似牛軋，也有前案如拖枪。世俗庸师多不取，那知异穴生贤良。

有如贪狼变文曲，撒网之形非碌碌。撒网之形似牛皮，不着绯衣多食禄。

有如贪变破军相，天梯隐隐如旗样。旗山若作盖天旗，旗下能生君与相。

有如破军变贪狼，贪狼入穴如拖枪。拖枪之穴人嫌丑，只缘缠护两山长。

贪变廉贞梳齿样，长枝有穴无人葬。人言龙虎不归随，那知葬了生公相。

变作辅星〔下有缺文，字数不详〕

变星篇，但是阴阳地理仙。凡遇龙神都照破，只缘心镜已昭圆。